



# REGLUGERÐ FYRIR VÖRÐ - FULLTRÚARÁÐ SJÁLFSTÆÐISFÉLAGANNA Í REYKJAVÍK

(Upphaflega samþykkt á Fulltrúaráðsfundi 19. mars og 21. maí 1940 og breytt á Fulltrúaráðsfundi 19. nóvember 1958, 5. júní 1969, 7. janúar 1974, 17. janúar 1978, 27. janúar 1996, 31. janúar 2004, 10. mars 2010, 19. febrúar 2011, 25. mars 2013, 5. desember 2019 og 5. júní 2024.)

## I. KAFLI ALMENN ÁKVÆÐI

### 1. grein

Sjálfstæðisfélögin í Reykjavík sem hafa verið viðurkennd af miðstjórn Sjálfstæðisflokksins mynda með sér ráð er nefnist Vörður – Fulltrúaráð sjálfstæðisfélaganna í Reykjavík sem er kjördæmisráð beggja Reykjavíkurkjördæma.

### 2. grein

Hlutverk Fulltrúaráðsins og stjórnar þess er m.a.

1. Að vera tengiliður á milli sjálfstæðisfélaganna í Reykjavík, vettvangur til að samhæfa starf þeirra og stjórna sameiginlegum málum þeirra.
2. Að bera ábyrgð á undirbúningi Sjálfstæðisflokksins í Reykjavík við almennar kosningar.
3. Að ákveða framboð flokksins, þ.m.t. að skipa kosningastjórn, og vinna að sem mestri kjörsókn stuðningsmanna hans.
4. Að gangast fyrir fundum og ráðstefnum um mál, er varða Sjálfstæðisflokkinn, starf hans og stefnu og að efna til hverra þeirra aðgerða, sem eru til eflingar almennu flokksstarfi Sjálfstæðisflokksins í Reykjavík.

5. Að sjá um, að alltaf sé fyrir hendi kerfi trúnaðarmanna Sjálfstæðisflokksins í Reykjavík
6. Að skipa, ef þurfa þykir, í samráði við stjórnir sjálfstæðisfélaganna sérstaka kosningastjórn í kjörhverfum Reykjavíkur á kosningarári, til að annast kosningastarf í hverju hverfi.
7. Að hafa umsjón með fjármunum fulltrúaráðsins og annarra sameiginlegra eigna flokksins í kjördæmunum.
8. Að sjá um að flokksstarfið í kjördæmunum sé í samræmi við skipulagsreglur flokksins.
9. Staðfesta lög og lagabreytingar sjálfstæðisfélaganna í Reykjavík.

## **II. KAFLI**

### **SKIPAN FULLTRÚARÁÐSINS OG STJÓRN**

#### **3. grein**

Í Fulltrúaráðinu eiga sæti:

1. Fulltrúar, sem kjörnir eru í ráðið af aðalfundum sjálfstæðisfélaganna í Reykjavík. Skal fjöldi fulltrúa sem hvert hverfafélag kýs nema 7% af fjölda skráðra félagsmanna á fyrsta virka degi ársins. Fjöldi fulltrúa sem Hvöt, Óðinn, Heimdallur og Félag eldri sjálfstæðismanna í Reykjavík kjósa skal nema 5% af skráðum félagsmönnum á fyrsta virka degi ársins þó að hámarki 150 fulltrúar.
2. Formenn sjálfstæðisfélaganna í Reykjavík.
3. Þingmenn og borgarfulltrúar Sjálfstæðisflokksins í Reykjavík sem og jafn margir varamenn þessara aðila.
4. Fastráðnir starfsmenn á skrifstofum flokksins og félaganna í Reykjavík, sem eiga lögheimili í Reykjavík.
5. Meðlimir miðstjórnar, fjármálaráðs- og upplýsinga- og fræðslunefndar sem lögheimili eiga í Reykjavík.
6. Allt að 100 fulltrúar samkvæmt tilnefningu stjórnar Fulltrúaráðsins til eins árs í senn, að loknum aðalfundi.
7. Flokksbundnir fyrrverandi alþingismenn Sjálfstæðisflokksins, flokksbundnir fyrrverandi borgarfulltrúar og fyrrverandi formenn Varðar – Fulltrúaráðsins sem lögheimili eiga í Reykjavík.

#### 4. grein

Kjörgengir í fulltrúaráðið eru flokksbundnir sjálfstæðismenn í Reykjavík sem eru félagar í einhverju sjálfstæðisfélaganna í Reykjavík. Verði breyting á lögheimili fulltrúa er honum heimilt að sitja fram að næsta kjöri.

Fulltrúarnir skulu vinna að þeim verkefnum í þágu Sjálfstæðisflokksins, sem stjórn Fulltrúaráðsins og stjórnir sjálfstæðisfélaganna óska eftir hverju sinni og skulu fulltrúarnir keppa að því að því að efla styrk Sjálfstæðisflokksins og stefnu hans. Stjórn Fulltrúaráðsins getur skipað skipulagsnefnd, fjármálanefnd, útgáfu- og upplýsinganefnd og aðrar nefndir sem hún telur ástæðu til.

Störf fulltrúa og fulltrúaráðsfunda eru trúnaðarmál og hafa fulltrúarnir þagnarskyldu um þessi málefni, að því leyti sem eigi er til ætlast að um þau vitnist til annarra. Rjúfi fulltrúi þennan trúnað eða brjóti að öðru leyti gegn reglugerð þessari í verulegum atriðum, skal stjórn Fulltrúaráðsins víkja honum úr ráðinu.

Stjórn Fulltrúaráðsins skal vera stjórnnum sjálfstæðisfélaganna innan handar við rekstur og skipulag þeirra. Óski stjórnir tveggja eða fleiri sjálfstæðisfélaga eftir því að fá að sameina starfsemi viðkomandi sjálfstæðisfélaga, þá skal stjórn Fulltrúaráðsins taka fyrirhugaða sameiningu til umræðu á fundi sínum og veita stjórnnum viðkomandi sjálfstæðisfélaga alla nauðsynlega ráðleggingu og aðstoð við undirbúning hins fyrirhugaða samruna. Þegar endanleg drög að samruna liggja fyrir skal stjórn Fulltrúaráðsins, í samvinnu við stjórnir viðkomandi sjálfstæðisfélaga, sjá um að kynna þau fyrir félagsmönnum viðkomandi sjálfstæðisfélaga. Áður en samruni gengur eftir skal hann borinn undir og samþykktur á aðalfundum allra þeirra félaga sem að honum koma. Hljóti fyrirhugaður samruni samþykkt allra viðkomandi sjálfstæðisfélaga þá skal hann í kjölfarið borinn undir stjórn Fulltrúaráðsins til staðfestingar.

Skjöl Fulltrúaráðsins skulu varðveitt á skrifstofu þess og aðgangur að þeim aðeins heimill þeim aðilum, sem stjórn Fulltrúaráðsins ákveður.

#### 5. grein

Í Fulltrúaráðinu starfar stjórn sem ber ábyrgð á skyldum Fulltrúaráðsins milli funda. Stjórn Fulltrúaráðsins skipa:

1. Formenn sjálfstæðisfélaganna í Reykjavík. Í forföllum þeirra koma varaformenn félaganna í þeirra stað. Varaformenn sjálfstæðisfélaga sem eiga rétt á 150 fulltrúum í Fulltrúaráðið skulu eiga sæti í stjórn Varðar, samhliða formönnum viðkomandi

félaga. Í forföllum formanna og varaformanna má formaður tilnefna stjórnarmenn í umræddum félögum í þeirra stað.

2. Átta fulltrúar kosnir á aðalfundi Fulltrúaráðsins til eins árs í senn. Þar af skal formaður stjórnarinnar kjörinn sérstaklega af aðalfundinum, en að öðru leyti skiptir stjórnin sjálf með sér verkum.

Skriflegum framboðum til stjórnar skal skilað með tölvupósti á netfang sem tilgreint skal í fundarboði fyrir kl. 16.00 þremur dögum fyrir aðalfund. Kjörgengir eru allir meðlimir fulltrúaráðsins.

Nú gefa fleiri kost á sér til stjórnarstarfa en kjósa á og skal þá fara fram kosning. Á atkvæðaseðli skulu vera nöfn þeirra sem í framboði eru og skal vera útfylltur ferningur fyrir framan hvert nafn. Kjósandi skal setja X í ferning fyrir framan nöfn þeirra sem hann kys.

Telst atkvæðaseðill ógildur ef merkt er við nöfn færri en fjögurra og fleiri en sjö frambjóðenda. á honum eru nöfn annarra en þeirra, sem skilað hafa inn framboðum innan framboðsfrests og kjörgengir eru.

## **6. grein**

Stjórn Fulltrúaráðsins ber gagnvart miðstjórn ábyrgð á því, að flokksstarfið í kjördæmunum sé í samræmi við skipulagsreglur flokksins. Stjórn Fulltrúaráðsins fylgist með því að félögin í Reykjavík kjósi reglulega fulltrúa í Fulltrúaráðið. Er stjórn flokksfélaga skylt að gefa Fulltrúaráðinu upplýsingar um félagatölu og önnur þau atriði, sem stjórn Fulltrúaráðsins er nauðsynlegt til þess að geta gegnt hlutverki sínu.

Stjórn Fulltrúaráðsins boðar fundi svo oft sem þurfa þykir. Skylt er stjórn ráðsins að boða til fundar innan tveggja vikna ef um það berst skrifleg krafa frá 50 fulltrúum eða fleiri enda sé þar greint fundarefni.

## **7. grein**

Stjórn Fulltrúaráðsins skipar sér framkvæmdastjórn. Skulu formaður, varaformaður, framkvæmdastjóri, ritari auk eins stjórnarmanns sem stjórn Varðar kys í framkvæmdastjórnina, mynda framkvæmdastjórn Fulltrúaráðsins. Framkvæmdastjórn Fulltrúaráðsins undirbýr stjórnarfund, annast almenn verkefni á milli stjórnarfunda og fer með önnur þau verkefni sem henni eru falin af stjórn Fulltrúaráðsins.

## 8. grein

Aðalfund Fulltrúaráðsins skal halda eigi síðar en í apríl ár hvert.

Boða skal til aðalfundar með a.m.k. viku fyrirvara, þó aldrei færri en fimm virkra daga, með auglýsingu á vefsíðu Sjálfstæðisflokksins og með tölvupósti til meðlima fulltrúaráðsins.

Á aðalfundi skulu tekin fyrir eftirfarandi málefni:

1. Skýrsla stjórnar um s.l. starfsár.
2. Kjör formanns og sjö annarra fulltrúa í stjórn ráðsins.
3. Kjör fulltrúa í flokksráð Sjálfstæðisflokksins. Félögin í Reykjavík hafa heimild til að gera tillögu um flokksráðsmenn þannig:
  - Heimdallur - 4 flokksráðsmenn
  - Hvöt - 3 flokksráðsmenn
  - Óðinn - 3 flokksráðsmenn
  - FESR - 3 flokksráðsmennSkipting þessi verði endurskoðuð á tveggja ára fresti.
4. Önnur mál.

Að loknum aðalfundi skal stjórn Fulltrúaráðsins senda miðstjórn skýrslu um störf Fulltrúaráðsins, skipan í stjórn þess og trúnaðarstöður ásamt afriti skýrslna þeirra félaga sem aðild eiga að fulltrúaráðinu.

## III. KAFLI

### ÁKVÖRÐUN UM FRAMBOÐSLISTA OG UNDIRBÚNINGUR KOSNINGA

## 9. grein

Í aðdraganda kosninga til Alþingis eða borgarstjórnar í Reykjavík tekur Fulltrúaráðið í Reykjavík ákvörðun um hvernig vali á framboðslista flokksins skuli háttað. Ákvörðun um prófkjör, uppstillingu eða röðun á lista skal vera í samræmi við skipulagsreglur flokksins og reglur miðstjórnar.

Í aðdraganda prófkjörs, miðstjórnarkjörs eða kosningar í kjörnefnd skal stjórn Fulltrúaráðsins skipa yfirkjörstjórn, sem annast undirbúning og framkvæmd kosningar. Í yfirkjörstjórn skulu formaður og framkvæmdastjóri Fulltrúaráðsins sjálfkjörnir, en að auki skal stjórn ráðsins skipa 3 menn. Yfirkjörstjórn skiptir sjálf með sér verkum. Verði einhver yfirkjörstjórnarmanna í framboði, kys stjórn Fulltrúaráðsins mann í hans stað.

Í Reykjavík sinnir yfirkjörstjórn vegna prófkjörs öllum hlutverkum kjörnefndar þar til úrslit prófkjörs liggja fyrir en þá tekur kjörnefnd við.

### **10. grein**

Ári fyrir kosningar eða svo fljótt sem auðið er, þegar kosningar eru ákveðnar með stuttum fyrirvara, skal stjórn Fulltrúaráðsins skipa þriggja manna undirbúningskosningastjórn sem annast undirbúning kosningabaráttu Sjálfstæðisflokksins í Reykjavík í umboði stjórnar Fulltrúaráðsins og í samráði við oddvita.

Þegar framboðslisti hefur verið samþykktur skipar stjórn Fulltrúaráðsins þrjá menn í kosningastjórn. Stjórn Fulltrúaráðsins getur breytt skipan kosningastjórnar þótt hún sé tekin til starfa. Fyrir borgarstjórnarkosningar skipar oddviti þrjá fulltrúa. Fyrir alþingiskosningar skipar oddviti hvors kjördæmis tvo fulltrúa í sameiginlega kosningastjórn Reykjavíkurborgar kjördæmanna.

Kosningastjórn ræður eða skipar kosningastjóra og framkvæmdastjórn og skal hún sinna daglegri stjórn kosningabaráttu Sjálfstæðisflokksins í Reykjavík.

## **IV. KAFLI TRÚNAÐARMENN**

### **11. grein**

Meðlimir fulltrúaráðsins eru trúnaðarmenn Sjálfstæðisflokksins í Reykjavík hafa það meginhlutverk að tala fyrir sjálfstæðisstefnunni og bera sérstaka ábyrgð í kosningastarfi flokksins, svo sem við úthringingar og útgáfustarfsemi. Trúnaðarmenn skulu leitast við að verða við boðun á ráðstefnur og málefnafundum flokksins.

## **V. KAFLI ÁKVÖRDUN UM FRAMBOÐSLISTA**

### **12. grein**

Þegar kosningar til Alþingis eða borgarstjórnar standa fyrir dyrum í Reykjavík, skal sérstök kjörnefnd starfa innan Fulltrúaráðsins. Kjörnefnd gerir tillögur um framboðslista

Sjálfstæðisflokksins við kosningar í Reykjavík til Alþingis og borgarstjórnar. Í kjörnefnd eiga sæti 15 menn þannig valdir:

1. Einn fulltrúi skipaður af stjórn Heimdallar, einn fulltrúi skipaður af stjórn Hvatar, einn fulltrúi skipaður af stjórn Óðins, einn fulltrúi skipaður af stjórn Félags eldri sjálfstæðismanna í Reykjavík og þrjú fulltrúar skipaðir af stjórn Fulltrúaráðsins. Stjórnin skal gæta að því að kjörnefndin sé fjölbreytt og að kynjahlutföll séu eins jöfn og kostur er á.
2. Að öðru leyti skulu 8 kjörnefndarmenn kosnir af fulltrúum í Fulltrúaráðinu. Framkvæmd kosningarinnar skal vera í höndum yfirkjörstjórnar.

Með minnst fimm virkra daga fyrirvara skal auglýsa á vefsíðu Sjálfstæðisflokksins og með tölvupósti eftir framboðum til kjörnefndar. Kjörgengir eru allir meðlimir fulltrúaráðsins í Reykjavík.

Framboðsfrestur skal vera að minnsta kosti þrjú sólarhringar. Framboð telst gilt, ef það berst yfirkjörstjórn fyrir lok framboðsfrests enda sé gerð um það skrifleg tillaga af fimm fulltrúum hið fæsta og af ekki fleiri en tíu fulltrúum. Frambjóðandi gefur skriflega kost á sér til starfans. Berist ekki fyrir lok framboðsfrests tillögur um fleiri kjörnefndarmenn en kjósa á, teljast þeir sjálfkjörnir sem tillögur hafa verið gerðar um. En komi ekki fram tillögur um fulla tölu kjörnefndarmanna, skal stjórn Fulltrúaráðsins skipa svo marga til viðbótar, að kjörnefnd verði fullskipuð.

Nú berast tillögur um fleiri menn í kjörnefnd en kjósa á og skal þá kjörstjórn að framboðsfresti liðnum auglýsa hvar og hvenær kosning fari fram.

Á atkvæðaseðli skulu koma fram nöfn þeirra sem í framboði eru og skal vera útfylltur feringur fyrir framan hvert nafn. Kjósandi skal setja X í fering fyrir framan nöfn þeirra sem hann kys. Atkvæðaseðill telst ógildur ef á honum er merkt við nöfn færri manna en sjö, fleiri en átta.

Stjórn Fulltrúaráðsins setur nánari reglur um framkvæmd kosningarinnar.

Við þingrof er stjórn Fulltrúaráðsins heimilt að ákveða að kosning 8 kjörnefndarmanna skv. 2. tl. 1. mgr. þessarar greinar fari fram á Fulltrúaráðsfundi.

Stjórn Fulltrúaráðsins ákveður hver kallar kjörnefndina saman í fyrsta skipti, en nefndin kys sér sjálf formann.

### 13. grein

Þegar kjörnefnd er fullskipuð skal hún boða til fundar með stjórnnum Fulltrúaráðsins og sjálfstæðisfélaganna. Á fundi þessum skal rætt um áherslur við skipan framboðslista en ekki gerðar neinar samþykktir enda starfar kjörnefndin ekki á neinn hátt í umboði þessara aðila. Kjörnefndin getur kallað slíka fundi oftár saman meðan hún situr að störfum, ef henni þykir svo henta.

Hafi fulltrúaráðsfundur tekið ákvörðun um að viðhafa prófkjör gilda prófkjörreglur Sjálfstæðisflokksins um það. Framkvæmd prófkjörs er í höndum yfirkjörstjórnar samanber 8. gr.

Kjörnefnd getur skipað undirnefndir eða vinnuhópa til að ganga frá tillögum um skipan í tiltekin sæti en allar tillögur skulu samþykktar af nefndinni allri til að öðlast gildi. Óski fimm nefndarmenn þess skal kosið um einstök sæti.

Ef tillaga er borin fram í nefndinni um að kjörnefndarmaður taki sæti á framboðslista skal hann víkja úr nefndinni og varamaður taka sæti hans, enda samþykki kjörnefndarmaður að frekari umræður fari fram í nefndinni um framboð hans.

Þegar kjörnefnd hefur gengið frá tillögum sínum um framboðslista skulu tillögur hennar kynntar fyrir stjórn fulltrúaráðsins og að því búnu lagðar fyrir Fulltrúaráðsfund, sem tekur lokaákvörðun um skipan listans, að áskilinni staðfestingu miðstjórnar Sjálfstæðisflokksins skv. XIV. kafla 54. gr. Skipulagsreglna Sjálfstæðisflokksins.

### 14. grein

Varðandi viðræður um meirihlutasamstarf við aðra flokka eða einstaklinga sem sæti eiga í borgarstjórn Reykjavíkur hafa borgarfulltrúar Sjálfstæðisflokksins samstarf við forystu Fulltrúaráðsins í Reykjavík. Þegar fyrir liggur tillaga um meirihlutasamstarf skal það ásamt málefnasamningi, liggi hann fyrir, kynnt og staðfest á fulltrúaráðsfundi.



## **VI. KAFLI**

### **REYKJAVÍKURÞING**

#### **15. grein**

Annað hvert ár að vori (ári fyrir og ári eftir sveitarstjórnarkosningar) skal stjórn Varðar skipa 5 manna undirbúningsnefnd sem halda skal Reykjavíkurbíng Varðar að hausti. Undirbúningsnefnd gerir tillögur að fundarsköpum sem samþykktar skulu af stjórn Fulltrúaráðsins.

Undirbúningsnefnd skipar stjórnir málefnaþópa. Á kosningaári skal Reykjavíkurbíng haldið áður en val á lista fer fram og skal það álykta í helstu málefnum sem varða Reykjavík. Undirbúningsnefnd skipar 3 manna samræmingarnefnd sem hefur það hlutverk að samræma ályktanir og skrifa stjórn málaályktun fundarins sem borin skal upp fyrir fundinn til samþykktar.

Þegar ekki er kosningaár getur stjórn Fulltrúaráðsins ákveðið að málefnaþarf verði fyrirferðaminna á þínginu en þess í stað verði tiltekið þema tekið fyrir á fundinum.

## **VII. KAFLI**

### **GILDISTÖKUÁKVÆÐI OG FLEIRA**

#### **16. grein**

Reglugerð þessari verður breytt á fulltrúaráðsfundi sem boðaður skal með a.m.k. fimm virkra daga fyrirvara. Í fundarþóði skal greina frá meginefni tillagna til breytinga á samþykktum og skulu endanlegar tillögur birtar í fundarþóðinu eða á vefsíðu Sjálfstæðisþlokksins á sama tíma.